

Դրանք գործարանային մեծաքանակ ապրանքներ ստացող տներ էին, որոնք իրենց գործակալներով և շարժիներով կապված էին գյուղերի հետ: Գործակալների դեր էին կատարում կամ գյուղերում մանր առևտրականները, կամ շրջող գործակատարները: Նրանք թե՛ գործարանային ապրանքների տեղերում ցրվողներ էին և թե՛ տեղերում բուրդ, կաշի, բոժոժ, գորգ և այլ տեսակի հումք և տնայնագործական իրեր հավաքողներ: Այսպես առաջ էր գալիս տեղական կապիտալի խոշոր և մանր տերերի ռեալ միասնություն, որը սակայն չէր ստացել իրավական կերպարանք և չէր ձևավորվել որևէ կազմակերպչական եղանակով, առաջ բերելով իր այդ շերտի շահերի ներկայացուցիչ որևէ հասարակական մարմին³⁶: Այդ ռեալ միասնությունը անշուշտ դեր խաղաց Զանգեզուրի հասարակական և քաղաքական իրադարձությունների մեջ մասնավանդ առաջին համաշխարհային պատերազմից հետո ծագած քաղաքացիական պայքարի տարիներին:

Այդ նորակազմ կապիտալիստական հասարակական շերտը XX դ. առաջին տասնամյակներում արդեն անցած էր իր զարգացման երրորդ փուլին՝ գիտությամբ օգնությամբ իր սոցիալական դիրքը բարձրացնելուն: Այդ շերտին պատկանող ընտանիքներից դուրս եկած երիտասարդությունը գրեթե ամբողջովին, սակավաթիվ բացառությամբ, ղեկավարում էր նախ տարրական դպրոցներում և ապա մի խոշոր տոկոսով անցնում էր միջնակարգ դպրոցներն ու համալսարանները: Այդ դասակարգային ծագում ունեցող անդամներով լրացվում էին անդրկովկասյան ինտելիգենցիայի շարքերը: Դրանց միջավայրից դուրս էին գալիս պետական ստորին և բարձր հիմնարկների ծառայողներ, բժիշկներ, իրավաբաններ, ինժեներներ, ֆինանսիստներ և արդյունաբերական աշխատողներ: Դրանք սակավ ղեկավարում էին մնում Զանգեզուրի գավառական հիմնարկներում աշխատելու: Մեծ մասը փոխադրվում էր Բաքու, Տփղիս, Գանձակ, Շուշի:

Առավելապես ոչ Զանգեզուրում կուտակված կապիտալն էր, որ XIX դ. վերջին քառորդից սկսած տեղավորվում էր պղնձահանքերի շրջանում, որտեղ Կատարի, Կավարտի և Հալիձորի գլխավոր հանքավայրերը մինչ այդ շահագործվում էին պրիմիտիվ ձևով կամ կալվածատերերի կամ գյուղական համայնքների ձեռքով: Մեկիքների ու բեգերի ժառանգների և համայնքների միջև այդ հանքերի շուրջը տեղի էին ունենում հաճախակի վեճեր, որոնք երբեմն փոխվում էին զինված ընդհարումների և վերջանում էին արյունահեղությամբ: Այսպես, 1872 թ. Սարգիս-բեգ Մեկիք-Փարսաղանյանը սպանվեց այն ընդհարման ժամանակ, որը Հալիձորի պղնձահանքերի սեփականության իրավունքների շուրջը հույն կապալառուների զրգմամբ բռնկել էր Մեկիք-Փարսաղանյանների և հարևան թուրք բեգերի միջև: Գավառապետ Ստոլբովսկին պաշտպան էր դուրս եկել այդ բեգերի շահերին:

Բայց արդեն դարավերջին հանքերի շահագործումը կենտրոնանում էր խոշոր դրամատերերի ձեռքին: Այստեղ դրամական ներդրումներ ունեին խոջամիրյանները, Մեկիք-Աղարյանը և Մեկիք-Ղաթազյոզյանը, տփղիսաբնակ խաչատուր աղա Նազարբեկյանը, որը գործում էր Բեկլար-բեգ թուրք կապալառուի օգնությամբ, և մասնավանդ հույն Կոնդուրով եղբայրները, որոնք խոշոր բաժին ունեին նաև Ալավերդու պղնձահանքերի շահագործման մեջ: Այդ դրամատերերը իրենց կառավարության միջոցին փորձում էին մտցնել մաս-

³⁶ Նման «Купеческая Управа»-ին: